

Vaivatul etal a ma amfalyawang tnabar ini

“TNABAR ILA’A”

I. TNABAR ULUN A

“Tnabar Ila’a” ini ntali roak ubud a nusid ovi rtali Tnebar – Maluku. Tnabar ini ba’i rala ma ala rsisobak. Tnabar ini ba’i rfaturu na’ut i rsoba ahu ngorva’an, ovu al rsoba orang ka’i t te Panas Pela ma neluk faneak ma rfalak fara weninyai.

“Tnabar Ila’a” ini rfaturu vali na’a Kota Jakarta ni amar vulan kena na’ut i ni varat ratut ifa’at vutlima rahin isa. Rfanara amar yai ne, amar ma “Tot Panas Pela.”

Pela ihin a ne, ahu irua te nlia tali inyai, rasdovu ira ma rot kidabela na’a Tnebar-Maluku. Ira ra’an vai isa ma rot Pela, ma rfamalola afa ovi nkena rira simaklivur a ovu tamata ra.

Na’a sidovung ini, na tamata ra rot kidabela na’a rira simaklivur ra, wean: ‘Pela ma rotu rihi’ te ‘Pela ma rsikadir lara, te Pela ma rsifangrebat ira, Pela ma rotu rira iya’an-iwarin (ra’an fneran isa), ovu na’a afa liak vali. Totu Panas Pela ma tfamalik ewal na’ut i tdoku temar lolan ma tfangrebat dida simaklivur i totu roak a.

Rfaturu Tnabar ini na’a Jakarta ma ala rfangnanang ni amar vulan kena a, ma nfatutu ne, Fareta na’a Maluku ovu ni tamata ra, inar urun ma rotu kidabela ovu tamata ovi rna’a Jakarta, ma rfakena mnga’un, ne ditinemun ikisa watan ita.

II. TNABAR FELAN A :

Tnabar Ila’a ini tali ubud-nusid ra, ovu afa mavu wean: ntali Hindu, Jawa, Cina, ovu ntali liak vali, wol rweang nala ia.

Ni sifat a bisma tsi’ik na’ut i rso’i-rsomar a, velik ne boku rfalak ne, biasa watan. Tnabar ihin a, rfamalik ma rivun na’a ni dadedang a. Tnabar ini ni bakreat ra, tali rira yabi enan ra, ovu rdamur ira, ovu vali rala somala’i, sislau, ovu bakreat – bakreat ovi ba’i rfenu na’a tena rira ra. Tnabar ini wean rotu snoba, ovu rfaturu afa ovi inar urun a.

III. TAMATA OVI RSO’I-RSOMAR RA :

Tamata ovi rso’i-rsomar na’a Tnabar ini, vutfat rahin irua. Brana ra: vutu rahin irua, vata ra: vututelu. Rira karya na’a tnabar ralan a, wean ini: tali brana vutu rahin irua yai, na: irua reluk raja, irua reluk mela ngrihi, inean rfefik tival ko’u, isa nfefik tival dawan (*Babal*). Ia ni karya ma nfabana te nfareta tnabar a ma nbana. Isa nfarai. Tali vata vututelu yai, na: irua reluk lamditi, ifa’at a rsomar. Vutrua rahin ifa’at reluk mela verin sidovung irua ini.

IV. TNABAR NI BANBANAN A:

A. Banbanan ulu a:

1. Tamata ovi rovu Tnabar ini, irmunuk rdedang dadedang isa ma rti wan i mane rtabar na’a. Raruan ira rti wan yai. Irua i reluk mela ngrihi, ula ira, beti tamata irua i rfefik tival ko’u, nata tamata isa i tfefik tival dawan a (*Babal*), beti vata i nfarai a. Nata vata vutrua rahin ifa’at i reluk mela verin sidovung irua yai, vata irua i rfefik tival ko’u, vata irua i rso’i-rsomar, vata irua i reluk lamditi, brana irua i reluk raja, ovu vali vata irua i rsomar a.
2. Rna’a munuk roak wan i mane rtabar a, beti mela ngrihi irua yai rsiamira na’a tnabar ni fruan a, ma isa nti timur, na isa vali nti varat, beti ovi rovu tnabar yai rotu rira vavevang ma felan wean vulan lahir, beti brana i nfefik

tival dawan a (Babal), ti ndiri vavevang ni fruan a, nata brana inean i rfefik tival ko'u ra, rdiri ulu. Brana irua i reluk raja yai, rdiri ebang vatlamditi irua yai, beti vata ifa'at i rsomar yai, rdiri muririra ra.

B. Tamata ovi rtali Pela "A" :

1. Raja ovu Lamditi Pela "A" nfamalik rira sejarah a, rira tnorung a, ovu rala tanlain ma ala rfamalik Pela "A" ovu Pela "B" ihin a.
2. Raja ovu Lamditi Pela "B" inar urun ma rera orang vali, beti tamata ovi rovu tncabar yai, rera orang vali tevek ira munuk inar.
3. Mela ngrihi ovu ovi rfefik tival ko'u ra, na'ut i tncabar a nbana, na ka'i rotu samsomar boku vali al neluk faneak ne,"Mela ngrihi" ira.

C. Panas Pela:

1. Raja ovu Lamditi raflurut/rsobak verin Duila'a, ovu verin uburir-nusirira ra, nata renu tuat i rsileti roak lararira, beti rfabana Snoba Panas Pela ini. Rotu munuk wean inyai, beti rala "Vatvelin isa" ma neluk faneak ma rsoba ira (Pela).

D. Tamata ovi rtali Pela "B"

1. Raja ovu Lamditi tali Pela "B" rdedang tanlain i ala rsoba ira, beti raja ovu Lamditi Pela "A" rdedang orang ira, boma ovi rovu tncabar yai, munuk lahir rdedang orang vali.
2. Mela ngrihi ovu ovi rfefik tival ko'u ra, na'ut i tncabar a nbana, na ka'i rotu samsomar boku vali al neluk faneak ne,"Mela ngrihi" ira.

V. TNABAR WAHAN A:

1. Vata i nfarai, wean i nfarai roak ma neluk faneak ne, tncabar a roak rok, na Raja ra ovu Lamditi ra tali sidovung irua ini, rotu faneak verin tamata ovi rovu tncabar yai munuk ma raflurut ma rfalak fara weninyai verin Duila'a, ovu uburir-nusirira ra, ovu vali tamata ovi ramunin ra.
2. Rban talik wan i rtabar na'a yai ovu dadedang isa (dadedang Panas Pela).

VI. BAKREAT RA:

1. Tival dawan isa, Tival ko'u ifa'at, Titir isa, Vunut irua, Sislau ifa'at, Sa'ir irua, Tuat kuri isa, Lela isa, ovu, Fneran wan isa.
2. **Raja ni bakreat ra:** Bakan blawat isa ovu 'Wangab' (Kalung leher dari kulit siput), Mas Vulcan, Suruk/Kris, Syal blawat isa, sislau tali lela, Krae (Nahin blawat ma neluk ni takil), ovu somala'i irua na'a ulun a.
3. **Kapitan/Mela ngrihi ni bakreat a :** Labir mane wean watan raja ni bakreat ra, na'uk somala'i isa watan na'a ulun a. Ia wol ntaha Suruk/Kris, Wangab, ovu Mas vulan.
4. **Tamata ovi rfefik Tival Ko'u:** Labir mane wean watan Kapitan/Mela ngrihi rir bakreat ra. Na'uk ira rala bakan ala rkeak twalarira ra, ovu bakan blawat ala rotu na'a eman.
5. **Tamata i nfefik Babal/tival dawan ovu tamata i nfarai :** Rira bakreat ra labir mane wean watan ovi rfefik tival ko'u ra. Na'uk ira rtaha vali Suruk/Kris ovu Mas Vulcan. Tamata i nfarai ntaha sa'ir irua na'a liman bela ovu balit a.

6. **Lamditi:** Bakan ovu ravit cole, Ngesa/Pending masa, npake somala'i irua na'a ulun a, Mas Vulcan na'a rean a, Ngoras, Kmena, Sislau na'a liman ra. Sislalu vutu rahin irua na'a liman mela a, ovu vali liman balit a. Sislau raruan na'a vali vahin mela ovu balit a. Sislalu fafa'an nana'a vali ean mela ovu balit a, ovu Shawls/syal tali bakan.
7. **Tamata ovi rsomar ra:** Labir mane wean watan bakreat ovi Lamditi npake a. Na'uk rpakai Somala'i sasan watan na'a ulurira ra, ovu rira ravit ra wol wear isa, ovu vali rpakai cole nahu murin.
8. **Tamata ovi ravevang a:** Labir mane wean watan bakreat ovi rsomar ra rpakai a. Na'uk wol rpakai sislau, ovu marumat, ovu vali cole.